

Centro di Bario Brazil y Comision
Bernadina Growell ta participa nan evento

Riba 5 y 7 di september venidero



ORANJESTAD (AAN): Centro di Bario Brazil y comision Bernadina Growell ta preparando pa eleccion di damita y dama cultural cu lo tuma luga riba diabierna 5 di september venidero pa 8'or di anochi den Centro di Bario Brazil. Lo tin 3 damita entre e edad di 13 pa 18 aña cu lo participa y 6 dama, tur ya adulto di 19 aña pariba. Nan tur lo competi pa e titulo maximo pa mira kende lo bay dirigi e parada. Tur lo haci presentacion den nan bunita trahe oficial di antaño. Lo e bira un anochi unico cu show cultural cu ta di nos. Esaki ta un eleccion cu ningun hende lo por perde caminda ta bay tin diferente show musical y baile.

Riba e diadomingo 7 di september, Dia di Brazil venidero lo ta un dia special cu mercado, cuminda crioyo y e parada cultural. E mercado di Brazil lo habri for di 10'or di mainta te den oranan laat di atardi. Lo tin un total di 23 tent cu un variacion di cuminda crioyo, coy bebe y remedi tera lo no falta. Tin espacio den fresco, na unda publico por come, bebe y presencia show y baile durante dia.

E gran parada cultural lo start

sali pa 3:30 di tardi. E ruta lo ta caminda e parada ta sali for di Centro di Bario Brazil, subi Caya Bernadina Growell, pasa pazuid di Sint Michael Scol, sigui pa Noord Cura Cabay, pasa banda di cas di famia Ras, bira riba Mabon, subi bek pa Caya Bernadina Growell y lo termina na Centro di Bario Brazil.

Un total di 11 grupo lo participa, cinco grupo di mucha y seis grupo di hende grandi, tres banda musical grandi y cinco disco. Esaki ta forma e parada cultural cu lo bira un parada hopi bunita y colorido.

Ministerio di Cultura, Departamento di Cultura Aruba hunto cu Centro di Bario Brazil y comision Bernadina Growell ta invita henter e pueblo di Aruba pa ban apoya e iniciativa aki cu ya cada aña ta bira mas grandi. Asina ta cu e fin di siman di 5 pa 7 di september venidero bo no por perde. Bin apoya nos damita y dama cultural, mira nos gruponan den trahe di antaño y gosa di nos musica tipico, incluyendo cancionnan di nos Mama di Cultura, Sra. Bernadina Growell den feliz memoria. Bin uni y wak nos cultura, flora y fauna.